

摘藻堂四庫全書薈要

史部

欽定四庫全書蒼要卷七千八百四十八

史部

大清世宗敬天昌運建中表正文武英明寬仁信毅大孝  
至誠憲皇帝聖訓卷十六

愛民二

雍正七年己酉十一月庚子

上諭內閣奉天地畝向來多有隱匿每有三四畝報一畝  
者是以槩以上則徵科民力輸將甚為寬裕後因有隱  
匿積弊民間互相爭競紛紛訐訟官民不便前歲朕遣

大臣官員清丈漸次釐正田畝皆得實數今若按畝俱照舊則徵糧恐小民輸將無力著盛京戶部侍郎會同奉天府府尹確查田畝之肥瘠分別上中下三則起科酌定成額永著為令

雍正八年庚戌二月戊辰

上諭陝西督撫等安西沙州等處招民屯墾原為惠養邊民之計是以累年以來備極籌畫經營期其得所今從雍正六年民戶到齊之日計算至辛亥年例當輸賦之

期但念小民甫經安插公私兼顧為難著寬期二年於  
癸丑年陞科俾民力寬裕俯仰有資以副朕格外加恩  
之至意

三月乙未

上諭內閣昔年

聖祖仁皇帝駐蹕熱河時凡商民貨物往來俱不輸稅嗣  
後著嚴行稽查無論滿洲綠旗兵弁儻有需索商民者  
即指名題叅治罪

七月戊寅

上諭四川巡撫憲德據奏打箭爐口外需用米石成都新繁等州縣士民情願捐運急公輸挽甚屬可嘉著該撫宣旨獎諭應領夫價仍著照數給領其已捐之米將存倉米石給還

九月乙酉戶部遵

旨覆奏太平峪所用民地已經加倍償給其旗人地畝應請行旗查案

上諭曰旗人地畝若賞給銀兩則旗人固得實惠而佃種之人未免無地可耕著再查入官地畝賞給使原佃之人仍得耕種

十月壬子

上諭戶部陝西四川地方民風醇樸歷年逋賦甚少查每年徵收錢糧之期四月完半十月全完此定例也朕思四月十月既屆納課之期小民必須預先經營是麥穀未收之時即為輸將之計或因稱貸而受剝於富豪或

因預糶而大虧其價值且如甘肅地方有徵收本色者若在糧穀未獲之前更為竭蹶歷來川陝錢糧既無拖欠之陋習著將四月完半者寬至六月十月全完者寬至十一月俟夏麥秋禾築場納稼之後從容完課俾民力舒徐以副朕愛養黎元之至意

戊午

上諭內閣烏蒙逆蠻不法雲貴四川現在用兵征勦聞川省之永寧建昌地方山路崎嶇所用軍糧皆須民人背

負方能運送非若坦途之可以車馬馱載也舊例每糧一石運送百里給與腳價一錢而民夫一名止能背負米糧三斗百里之程須行兩日是百姓一日之所得無幾未足供其日用之資著該撫即行確查凡川省有山路險峻之處運送軍糧需用人力與永寧建昌相類者著將腳價速議加增一面奏聞一面即行給發其他雲貴等省若有似此腳價不敷之處亦著該督撫確查增添仍一面奏聞該地方有司務當實力禁止侵冒等弊



使力役之民實沾恩澤

十二月丁巳

上諭戶部朕查陝西臨洮府屬之保安堡番民歸化多年按照田畝起科共額徵糧八百一十五石五斗因該堡向日止設番兵一百二十名即以應納之額糧抵作應支之兵食伊等知種地而不完賦知充伍而不領糧相沿已久嗣因番兵差操未便於是另募內地民兵二百名以備防汛即將額徵之番糧充作兵丁之月餉其舊

設番兵悉行開除惟是保安一堡與新附上下龍布阿步喇等番族界址相接新附番族俱按戶科糧每戶止納青稞一斗而保安則按田起科以不及千戶之番民歲徵糧八百餘石未免多寡懸殊非朕一視同仁之意著將保安堡番糧亦照新附番民之例每戶納糧一斗徵收在倉留為積貯其現募之兵丁二百名所須糧料俱照例給與折色以示朕加恩番民之至意

雍正九年辛亥四月戊午

上諭內閣聞天津一帶民間漁船專以販魚為業每年穀

雨以後芒種以前是其捕取之時亦猶三農之望秋成也若此時稍有耽誤則有妨一年之生計矣目今天津運往山東積貯米糧皆僱覓漁舟裝載然亦當聽小民之情願勿以濟山東百姓之儲而妨直隸民生之計著直隸總督天津總兵官速飭辦理糧務人員就近酌量此時不可強僱漁船致令失業此係積貯備用之米石俟過芒種以後運送亦未為遲其速將朕諭徧行傳知

六月庚戌

上召入大學士九卿等諭曰自五六月以來直隸山東河南雨澤愆期亢旱日久我君臣間必有上干

天和之處仰蒙

上天仁愛特以旱災垂象示儆朕心憂懼焦勞時加修省輾轉思維無以自解此皆朕薄德之所致無可推諉但大臣等亦當敬畏悚惕省愆思咎各矢誠心寤寐警勉念此三省數百萬蒼黎皆吾赤子將來秋禾不登無以

養生必致狼狽若不先期籌畫多方儲備臨時雖欲補救亦恐無及著大學士九卿等悉心酌議作何先期料理務期人力能周救荒有策米穀可以轉運膏澤不致稽遲俾此被災民人咸慶生全無一人轉乎溝壑如此則朕之殷憂可以稍釋於萬一或邀

上天慈鑒稍寬吾君臣之譴責也

丁巳

上諭內閣朕因今年五六月間直隸河南山東三省雨澤

愆期宵旰焦勞無時或釋深恐秋稼不登百萬黎民艱  
於粒食將來救荒濟困人力難周特命大學士九卿等  
竭慮殫心為先事圖維之計以贖

上天之譴責稍解朕心之憂煩昨大學士九卿等會議截  
漕通商及遣官分查賞給籽種捐穀議叙各條具奏朕  
已一一允行又特降諭旨將山東河南二省本年漕糧  
暫停徵收蓋欲使本地之米散布於民間更勝借資於  
他省也今據河南署撫張元懷奏報河南南陽汝寧歸

德四府從前陸續霑被甘霖六月十四十五兩日開封  
省城大雨滂沛四野霑足又據山東巡撫岳濬奏報東  
省自六月以來陸續得雨六府九州膏澤已遍直隸署  
督唐執玉亦以所屬得雨之州縣陸續奏報觀此景象  
仰蒙

上天矜憫下民而賜以生全之慶將來即有成災之州縣  
亦不至於甚廣人力尚可展施矣朕以手加額既感且  
慰其廷臣所議預籌各件朕意仍照前議預備為是惟

是本地紳衿富戶捐穀助賑予以議叙一條此等事向來奉行不善輒生虛冒濫竊之弊且捐穀多寡如何分別議叙之處原議俱未明晰恐臨時難於遵行亦須預先定議又河東二省漕糧暫停徵收將來成災之處自另有恩旨其不成災之處或用折色交官或仍徵本色將此穀石即糶賣於本省之民人二者孰於民間有益著大學士九卿再行詳議具奏

七月乙酉



上諭內閣朕以直隸山東河南夏間雨澤愆期特命截漕  
查賑既而三省陸續奏報得雨朕心稍慰茲聞直隸山  
東及河北彰德衛輝二府有窮民因秋成無望預為渡  
河而南以圖就食者蓋因本地歉雨之時尚未聞截漕  
查賑之諭旨輒思就食他省若即令資遣還鄉恐時屆  
仲秋耕種之期已過轉致失所著該撫飭令沿河州縣  
於各渡口詳詢其所欲往地方有力不能自達者量給  
路費仍知照該州縣善為安插除有親朋可依及已傭

工得食者聽其自便外其乏食之民著用截漕米石照例計口賑給有欲回本籍者即給資遣回其不願即歸者候來春給以資糧使之回籍俱照例動用存公銀兩造冊送部如各省樂善之家有能存恤周濟者該地方官酌量輕重賞給花紅旗匾最優者詳請題達給以頂帶以示鼓勵設愚民無知因鄰省安插得宜仍復離鄉棄業該地方官務悉心安集剴切曉諭令其勿離故土又聞渡河流民有欲往湖廣者去鄉更遠回籍愈難著

該地方官即於所到地方安插務須規畫盡善無使一夫失所以副朕勤恤民隱子惠元元之意

十二月甲辰奉天府府尹楊超曾奏奉天各屬從前一切公務皆取給里下總計一歲之科派多於正額之錢糧臣已嚴飭各屬勒碑永禁竝令嗣後徹底澄清不許絲毫派累

上諭戶部從來地方科派陋規甚為民間之擾累楊超曾通行查禁辦理甚是但恐相沿已久官吏人等尚有陽

奉陰違者又恐日久法弛將來接任之員或有仍襲從前之陋習者著將楊超曾所奏宣示於外令奉天官吏人等永遠遵行以除積弊以惠閭閻

雍正十年壬子七月庚寅

上諭辦理軍機大臣等京中送往軍營之器械等項甚多驛站雖備有車輛每遇物件繁多之時官軍不能敷用勢必僱募民車運送寬裕給與價值惟是官吏等奉行不善每於數日之前即將商民車輛牲口拘集於驛站

地方令其守候備用至起運日期始給運價其餘耽擱之日竝不准算以致商民探知信息即行遠避行旅畏懼不前嗣後著嚴行禁止

雍正十一年癸丑五月丁亥

上諭戶部山東通省近報甘雨露足但從前有得雨稍遲之州縣今年二麥歉收民力未免拮据錢糧輸納承辦維艱朕心軫念爾部即行文該督撫得雨稍遲之州縣衛所應徵新舊錢糧緩至秋成之後再行開徵以示朕

體恤閭閻之至意

庚寅

上諭戶部各省州縣設立社倉原以便民濟用若遇應行借給之時該州縣一面申詳上司一面即速舉行方可  
以濟閭閻之緩急儻其中有假捏虛冒等弊自難逃督撫之耳目聞直隸百姓借領社穀必待督撫咨請部示而後准行往返動經數月小民懸待孔殷仍不免重利告貸之苦嗣後著該督李衛酌量定例變通辦理咨報

存案

辛卯

上諭戶部上年江蘇等處被水之州縣朕已降旨多方賑濟今春又復添賑四十日以加惠貧民茲當徵收錢糧之時其被災稍重之處小民輸課未免艱難著該督撫秉公確查將應行緩徵之州縣奏聞緩徵待至秋成再令完納以紓民力

雍正十二年甲寅二月壬子

上諭內閣聞江南通州濱海地方上年秋收稍歉現今米價昂貴鹽場竈戶謀食維艱將來青黃不接之時尤不可不加賑恤著署總河高斌即將通州鹽義倉存貯之穀酌撥數千石委員分運各場設廠煮賑再行酌量撥運平糶至各場竈戶有現在應徵折價錢糧著一槩暫緩至秋成之後再行徵收

九月丁酉

上諭內閣陝省今歲秋禾受旱水田雖可有收而旱田收



成大減明年青黃不接之時米糧或至騰貴不可不預  
為籌備查陝省與河南接壤雍正十一年春間撥運豫  
米十萬石自水次裝載直抵西安已有成效上年曾令  
河東總督王士俊於沿河州縣水次貯穀三十萬石竝  
將上年豫省漕米截留易穀以備陝省之用是豫省備  
運陝省之米甚為充裕儻明年陝省有需用之處著巡撫  
史貽直等一函具奏一面即將需用米數行文王士俊  
料理照上年之例由水道運赴西安應用將此并諭王

士俊知之

十月丁未

上諭內閣數年以來甘肅等處地方辦理軍需民人等輓輸効力朕心深為軫念已屢加恩澤以示嘉獎前據督撫等奏報今年禾麥收成俱好朕心深慰今聞秋間有雨少之州縣如階州靖遠環縣數處收成不足民食稍艱或他處有似此者亦未可定著劉於義許容確加查訪所有歉收之處或應蠲免或應停徵其乏食之民如

何撫恤一面定議奏聞一面即行辦理若西安所屬有  
秋田歉薄之州縣著史貽直碩色亦即確查奏聞照此  
辦理

雍正十三年乙卯三月庚寅

上諭內閣朕聞南方濱江兩岸多係蘆洲民間俱將蘆葦  
堆貯洲上賣以度日而江楚及上江各幫漕船由江往  
回竟有不法水手每遇蘆葦堆積之處輒糾集多人蜂  
擁上岸恃強奪取洲民攔阻動輒毆詈民多怨言夫領

運弁員即坐本幫糧船之內水手肆行如此安得推為不知至督運之糧道押運之廳員雖云統轄衆幫亦當留心查察何得任其多事著漕運總督通行曉諭儻有仍蹈前轍者經朕訪聞必將文武大小運官分別嚴加議處

閏四月戊寅

上諭禮部凡烈婦輕生從死昔年


聖祖仁皇帝曾降旨禁止朕於雍正六年又降旨曉諭至

明且悲數年以來因各省奏請旌表烈婦者尚少朕是以格外加恩准其旌表今數日之內題奏殉夫盡節之烈婦烈女如此之多可見地方官未將從前諭旨剴切曉諭鄉曲愚民尚未深悉

聖祖仁皇帝與朕重惜民命之至意以致民間婦女激烈捐軀者更多於前嗣後若槩予旌表恐轉相則效易致戕生深可憫惻著地方有司將朕前旨廣為宣布俾遐隄僻壤家喻戶曉儻宣諭之後仍有不顧軀命輕生從

死者不必槩予旌表以長閭閻憤激之風

大清世宗敬天昌運建中表正文武英明寬仁信毅大孝  
至誠憲皇帝聖訓卷十六



總校官庶吉士 臣張能照

校對官編修 臣周厚轅

謄錄監生 臣沈東昇



欽定四庫全書叢要

史部

世宗憲皇帝聖訓卷十七  
八

詳校官編修臣繆晉

欽定四庫全書薈要卷七千八百四十九

史部

大清世宗敬天昌運建中表正文武英明寬仁信毅大孝  
至誠憲皇帝聖訓卷十七

恤兵

雍正元年癸卯三月己酉

上諭八旗都統等私行科派殊非善事貧乏兵丁所恃以  
為生者惟在錢糧嗣後各旗佐領下一應公中事務概  
不許私自派取若有擅行私派者即以作弊治罪

四月丁卯

上諭吏部戶部兵部各省給發駐防官兵米穀草豆等項價值不一除已有定額省分照常給發外其餘未曾定額省分多寡不符理應將本省歷年給發之價酌處其中畫一定議價值一定便於遵行如遇年豐價平稍有贏餘於官兵亦屬有益儻歲歉價昂該督撫據實陳奏朕自加恩

五月庚辰兵部議覆雲貴總督高其倬奏免鶴

永等處取藏兵丁賠補倒斃馬匹應不准行

上諭曰兵丁遠馳異域甚屬勞苦且滿洲綠旗俱當一視其倒斃馬匹若仍令伊等賠補朕心不忍著盡行豁免  
十月辛未

上諭八旗大臣等八旗滿洲為我朝根本植本不可不固近見八旗兵丁技勇產業大減於前此皆文武臣工仰恃

皇考之寬仁遂乃怠於公務不勤厥職玩忽苟安因而法

制廢弛兵丁等既無教訓之人遂少儆惕之意不習騎射不諳生計妄費濫用競尚服飾飲酒賭博漸至困窮從前

皇考恩養兵丁屢加賞賚代償逋欠又設立公庫以利濟之惠澤雖頻空乏如故曾何裨益乎朕今初登大位未遑徧行查視惟爾諸臣是賴限於三年內將一切廢弛陋習悉行整飭其各實心任事訓練騎射整齊器械教以生理有頑劣者即懲之以法儻至三年仍不悛改朕

必行罰無赦再叅領一官管轄多人辦理旗務甚屬緊要優者留用劣者即行罷黜至於兵丁器械既於明年十月點閱爾諸臣應即行查看有不齊者令其佐領內預為補足今不置備臨期倍價賒買又為債負所累貧乏兵丁何以為生凡此等處諸臣宜各留意也

雍正二年甲辰正月辛丑

上諭八旗都統等八旗滿洲蒙古漢軍人等俱經累世効力現今承平既久滿洲戶口滋盛餘丁繁多而護軍馬

甲額設有定是以不得披甲之間散滿洲至有窘迫不能養其妻子者朕每加憫念將如何施恩俾得資生之處再四籌度並無長策若欲增編佐領恐正項米石不敷若不給與錢糧養贍伊等何以聊生既不能養其家口何由造就以成其材今將八旗滿洲蒙古漢軍內共選取四千八百人為教養兵訓練藝業所選人等每月給與錢糧三兩計四千八百人每年共需錢糧十七萬二千八百兩每一旗滿洲蒙古漢軍共六百名內滿洲

四百六十名蒙古六十名漢軍八十名其漢軍之八十名令為步兵每月給與錢糧二兩就此錢糧數內計其贏餘通融料理可以多給四十名兵丁每漢軍一旗著選取一百二十名再軍器內長槍尤為有用著滿洲蒙古每佐領下選取護軍四名馬甲四名令其學習長槍漢軍每佐領下選取馬甲四名令其學習藤牌挑刀此四千八百名教養兵若計佐領選取恐其人多寡不同應於旗下甲喇內通計人數選取則護軍馬甲益得



有用之人而閒散餘丁亦得學習成就矣至於如何編錄教訓管轄之處八旗都統護軍統領副都統等公同盡心詳酌務期永遠可行定議具奏

九月癸卯

上諭戶部前往臺灣換班兵丁俱在臺灣支給糧餉伊等所留家口無力養贍必至內顧分心著將兵丁所留家口每戶賞月米一斗內地米少卽動臺灣所有之米合算船價僱運至廈門交地方官按戶給發務使均霑實

惠

雍正三年乙巳六月壬辰

上諭戶部今年雨大屋漏牆欹者多朕軫念披甲人等家貧不能修理特加恩賜務使人人得所著動戶部庫銀九萬兩賞給八旗每旗一萬兩上三旗內府佐領一萬兩令得修理房屋著八旗都統前鋒統領護軍統領副都統內務府總管會同酌議分別賞給

雍正四年丙午十月甲子

上諭兵部各省駐防兵丁已故者其婦女每年以船載送  
回京江南浙江等處俱於七八月起程福建廣東荊州  
等處俱於四五月起程沿途換船船戶惟利是圖故意  
延挨一到臨清濟寧地方即稱恐致冰凍仍令岸路來  
京中途苦累甚屬可憫嗣後著於定限之前一月起程  
交與沿途地方官速換船隻與糧船一例照管督催務  
令必至張家灣庶寡婦等不致苦累而回空船隻亦不  
致守凍矣

十二月戊午四川巡撫法敏奏進勦建昌冕山苗  
蠻之官兵請暫照松潘戍守兵丁例支給口糧陸  
續扣還

上諭兵部向來官兵凡在內地行走者例不給與口糧朕  
思內地亦有遠近之分行走不無遲速之別宜酌加恩  
澤以獎勤勞今建昌官兵因進勦賊蠻已經深入梁山  
此地舊稱險遠並非內地可比而賊徒金格等潛匿荒  
僻之區尚未授首現在官兵各處搜勦奮勇効力甚屬

可嘉查前歲進勦南坪時官兵俱經給與口糧今進勦  
梁山官兵著照南坪之例一體支給口糧以示朕撫恤  
兵丁之至意

雍正五年丁未九月丁卯雲貴總督鄂爾泰奏雲  
南提督郝玉麟帶兵進又木多時各兵曾借餉銀  
原議分三年扣還請展限六年以紓兵力

上諭兵部當日兵丁前往又木多時未免起身匆忙馬駝  
之屬畧覺多費朕心軫念原欲將借支餉銀全行豁免

以示恩恤因一時未暇降旨今覽鄂爾泰所奏著將應扣銀四萬三千兩悉行豁免其已扣之七千餘兩仍照數賞給兵丁以副朕愛養兵丁之至意

十月丙戌

上諭內閣八旗滿洲火器營護軍校及兵丁等往蘆溝橋操演槍礮起身甚速天氣寒冷著每人賞給銀五兩製備禦寒衣服不得妄費

雍正六年戊申九月己酉

上諭兵部各省水師兵丁惟福建最為熟練朕前降旨令藍廷珍揀選五十名發往浙江照陝西兵丁赴浙之例令其補充營伍教習浙江水師其起身盤費及到浙安插之處令高其倬李衛照例賞給查湖北湖南共有水師七營向來操演亦未精熟須得閩人為之教道著照浙江之例令藍廷珍揀選熟練之兵丁五十名發往湖廣交與總督提督分撥各營令其教習其起身盤費及在楚安插之處亦著高其倬邁柱等照浙江之例料理

賞給再舊例湖廣鎮標協標考拔千把先行咨送提督轉送總督再加考試方行補用但湖南湖北路途遙遠又隔洞庭之險微弁往返艱難資斧不易且致久曠汛守嗣後湖北二十四營千把專隸總督考定咨知提督湖南二十四營千把專隸提督考定咨知總督俾微員得省遠行之費而汛守亦不至於久曠若新任總督提督到楚之時南北各標武職等官仍聽總督提督通行調試分別優劣



十一月戊午

上諭內閣邇年川陝漢土官兵勦撫番苗遠涉藏地効力  
勤勞朕心深為軫念著動支庫帑銀十萬兩交與總督  
岳鍾琪會同四川提督黃廷桂酌量分別等次通行賞  
給以示朕加恩沛澤之至意

乙亥

上諭兵部雲南等省所有苗蠻獯獷種類甚多殘忍性成  
逞兇嗜殺剽掠行旅賊害良民又或劫去人口重價勒

贖所以為內地平民之害者不可枚舉而衆苗之中又復互相讎殺爭奪不休於其所轄土民則任意傷殘草菅人命朕念普天率土之民皆吾赤子豈肯令邊省蒼黎獨受苗人之侵擾而苗衆繁多朕亦不忍聽其獨在德化之外是以從封疆大臣之請勦撫兼行切加訓誨務以化導招徠為本不可脅以兵威或致多有殺戮屢頒諭旨甚明今幸數年之內苗人陸續歸誠者甚衆將來可望地方寧謐但官弁士卒跋涉於深林密箐之間

歷險峻之區染瘴癘之氣而苗性狡獪反覆當用兵之際往往詭詐負嵎出其不意以致官兵受傷亦間有之事夫弁兵受國家多年教養之恩雖臨陣捐軀義不避難但以蠢然無知之苗蠻而致損我義勇之士卒得失不足相抵朕心深為憫惻除已降旨賜卹賞賚外其雲南貴州四川勦撫苗蠻之官弁兵丁從前若有預借銀兩俱免其還項陣亡之官弁兵丁著照陣亡例加倍賞給銀兩得病身故及受傷之官弁兵丁著照陣亡例賞

給銀兩俱交與鄂爾泰岳鍾琪各於所屬確查動帑遵旨賞賜務俾均霑實惠以副朕優卹弁兵之至意

十二月戊戌

上諭兵部哈密駐防官兵每年輪換定期於十二月內派往朕思臘月天寒草枯水凍官兵跋涉為難查從前甘肅官兵駐防哈密有五月內更換之例今仍著於五月內派往

雍正七年己酉正月己未

上諭兵部福建臺灣戍守之兵丁父母妻子留在內地前  
已加恩每月給與米糧以資養贍聞臺兵之例每月將  
所領錢糧扣留五錢於內地為養贍家口之用朕思兵  
丁遠涉海洋所得餉銀又復扣除以養家口恐本身用  
度或有不敷今沛特恩於駐臺兵丁每年賞銀四萬兩  
為養贍家口之用著總督等均勻分派按期給發俾兵  
丁本身食用既得寬舒而父母妻子之在內地者又得  
養贍以示朕卹兵賞勞之至意

二月丁丑

上諭兵部陝省兵丁年來効力甚多朕深為軫念伊等出征之時若因已給行糧遂扣其坐糧則伊等妻子在家難以養贍嗣後出征兵丁於照例支給行糧外仍給與坐糧銀米俾免內顧之慮再陝西營伍甚屬緊要若兵丁有派出之處著總督岳鍾琪酌量召募充補另行按名給以錢糧

三月戊午

上諭內閣朕為在京八旗兵丁悉心籌畫其家若有吉凶之事需用之費無所取辦一時拮据實為可憫特給內庫銀兩令王大臣等營運生息以備兵丁一時之用今思外省駐防之滿洲漢軍兵丁等亦當一體加恩江寧杭州西安京口荊州廣東福建寧夏右衛共九處每處賞銀二萬兩天津河南潼關乍浦成都共五處每處賞銀一萬兩俱著於布政司庫內支給交與該將軍副都統等公同存貯營運生息如該處駐防兵丁家有吉凶

之事將息銀酌量賞給以濟其用其本銀永遠為存公  
生息之項不令繳還該將軍副都統等務須盡心辦理  
使兵丁均霑實惠儻該管大臣官員有私自侵蝕那移  
或委任非人以致本利虧缺者定行從重治罪仍於該  
管及委用等官名下嚴追還項其營運利息之處亦必  
公平辦理儻指稱官銀名色或占奪百姓行業或重利  
刻剝閭閻與商賈小民爭利擾累地方著各督撫不時  
稽查即行叅奏儻督撫徇隱不奏經朕訪聞必將該督



撫一併議處此項本利銀兩每年出入之數交與在京  
八旗都統副都統查核一旗或管一省或管二省著怡  
親王大學士等酌量派定每年於歲底各省該管大臣  
官員等造冊齎送各該旗查核奏聞再各省督標撫標  
提標兵丁等亦做此例每標或給銀一二萬兩或給銀  
數千兩按照兵丁之額數分別銀兩之多寡亦著怡親  
王大學士等酌量派定其銀即交與各該督撫提督委  
員料理以惠濟兵丁一切照駐防之例行其前後接任

之時將此造入交代冊內查核至於各省鎮標兵丁等  
一時難以遍及候朕酌量國用之出入次第加恩陸續  
降旨

四月丁丑

上諭內閣官兵馬匹其有倒斃免賠椿銀者各省不同從  
前補以中茶馬匹及後則給以朋銀採買此諸省通行  
之例惟有陝甘各營因停止招中茶馬之時未將動支  
朋銀聲明是以相沿至今凡有倒斃馬匹俱係兵丁出

資買補深可軫念著總督岳鍾琪詳悉查明將嗣後作何准報補給之處分晰定議具奏

甲午

上諭內閣八旗兵丁並各省駐防以及各標兵丁朕已賞給銀兩令該管官員經營生息以濟其吉凶緩急之用今因征勦準噶爾派出兩路大兵遠臨邊塞此所派兵丁等既為國家効力行間朕心更為軫念已於行糧恩賞外給與坐糧以養贍其家口但兵丁等出門之後家

中若有吉凶之事料理無資不可不為籌畫周濟除京城八旗出征兵丁該旗照例支給外其奉天等處八旗出征兵丁著照京城護軍之例吉禮賞銀十兩喪禮賞銀二十兩其直隸山東山西河南陝西等處出征綠旗兵丁著照京城驍騎之例吉禮賞銀六兩喪禮賞銀十二兩凡此賞給銀兩其有已經孳生利息之處即於利息內支給其未曾賞銀及雖經賞銀而尚無利息可支之處即動正項錢糧支給著該管官員通行曉諭使出

征兵丁咸共知悉伊等家中遇有應領賞銀之時即報明本管官出具領結照數支領毋得稽遲俾効力行間之士均霑實惠無內顧之憂以副朕加恩沛澤之至意

閏七月庚辰

上諭兵部駐藏兵丁其家口在家著照出征兵丁之例給與坐糧以為養贍之資若家有喜喪事件亦照出征兵丁例賞給銀兩

八月甲辰

上諭兵部凡兵丁等承應官差養贍家口專於糧餉是賴  
乃有射利之舖戶土豪人等交結隊目廣放營債以取  
重利兵丁墮其術中借銀到手隨意花費及至領餉之  
時不足以飽債主之谿壑此實兵丁等暗中耗費以致  
窘乏之由也向來旗人有放印子錢各色等弊今嚴禁  
之後兵丁漸覺從容著通行文武官員出示曉諭嗣後  
不許舖戶土豪人等再放營債違者從重治罪其從前  
已經借給者著清還本銀不許收取利息將此懲債主

之貪心以杜暗蝕兵糧之患其營伍兵丁彼此借貸者除朋情緩急通融外若有放債圖利剝削同輩者著該管官稽查嚴禁儻違禁不遵一經發覺將該管官一併議處

十二月癸卯署陝西總督查郎阿奏西路一應軍需兵馬俱由嘉峪關出口肅州米豆草束昂貴該鎮標兵額餉本色少而折價多不敷糴買之用請酌量加增

上諭內閣朕前因寧遠大將軍岳鍾琪之請特念哈密為軍需往來之地將駐防兵丁增給口糧鹽菜今肅州為大軍出口要道辦理軍務之員咸集其地食指繁多未免物價昂貴著將肅鎮兵丁折支米豆每石於折中一兩之外增給銀五錢每草一束增給銀一分自雍正七年秋季起至大兵凱旋之日俱照增加價值每季按名給發毋得扣剋侵漁統入該年奏銷冊內報部查核以示朕軫念邊兵至意



丁巳

上諭兵部天津水師營兵丁錢糧前經部議每月定為一兩五錢朕近聞兵丁用度稍有不敷已降旨加為每月二兩浙江乍浦水師營兵丁亦應一體加恩其新拔之兵丁等每月支銀一兩五錢者亦著照天津之例加為二兩

雍正八年庚戌三月乙酉

上諭內閣從前陝甘各標及松潘鎮出征兵丁添補衣裝

據大將軍岳鍾琪奏明動支各兵家口夏秋二季一半  
餉銀製備今總督查郎阿等奏報俱已製辦運送軍前  
訖兵丁等効力行間遠征邊塞朕心深為軫念此所添  
補衣裝銀兩著加恩賞給不必扣除伊等家口月餉即  
行文陝甘川三省並大將軍處曉諭兵丁知之

八月癸丑

上諭兵部從前以武弁一年所得俸薪不敷所用令自提  
鎮以至千把總俱量給與親丁名糧以資養贍今各省

添設外委千把尚未議及念此外委人員所辦者千把總之事而所食者仍止本身一分馬糧一應公差紙筆衣馬之費實有不敷著將各省添設外委千把總每員給與步糧一分即令伊之子弟家人頂食以資養廉倘有巧借辦公名色扣剋兵餉滋擾地方者著該管官即行揭報該轄大員指叅毋得姑徇寬縱

九月丁卯

上諭八旗都統八旗兵丁等房屋傾圮者昨已每旗賞銀

三萬兩為修理之用間該管之都統官員等不論坍塌  
牆屋之多寡及有無傷損人口之處一概均勻給散並  
無差等其名則均而實則不均之甚總因伊等潦草塞  
責不肯以實心經理公事俾朕之恩澤不濫不偏登衆  
兵於衽席也除從前所賞銀兩各旗已經均給外朕再  
賞每旗帑銀三萬兩著該旗大臣等悉心確查分別等  
次秉公賞給務令苦寒之家實霑恩惠儻仍任意給發  
不能公當者經朕訪聞必於該旗之大臣官員是問至

於八旗官弁已給半年之俸不在查賞之內

十月辛亥

上諭內閣年來出征兵丁在外支給口糧而仍給與坐糧以養贍其家口蓋因其荷戈持戟効力戎行不忍令有內顧之慮也至各省土兵有派撥征勦者則於起程時賞給銀兩而無養贍家口之例朕思本身遠出在外則於營生之計不能兼顧其父母妻子或至俯仰無資深可軫念嗣後土兵之出征者除恩加賞賚外其父母妻

子在家照守兵坐糧之例每月給銀九錢米三斗米折銀賞給著督撫提鎮差委官弁前往該地方會同土官秉公散給務令均霑實惠儻有侵蝕扣剋等弊一經發覺定行從重治罪決不寬貸目今雲貴川廣等省効力之士兵即照此例行並將此旨通行曉諭各省土兵知之

十二月戊戌

上諭兵部前因口外用兵哈密為軍需往來之地特准大

將軍岳鍾琪之請將駐防兵丁口糧鹽菜加恩增給又  
准署總督查郎阿之請將肅鎮兵丁折支米豆草束銀  
兩各行增給總以肅州哈密一帶地方兵馬往來物價  
未免昂貴故加恩於常格之外也今思嘉峪關在肅州  
哈密之間其地苦寒所需兵糧皆從肅州轉運事屬一  
體其營汛兵丁折支米豆草束之價俱著照肅鎮之例  
米豆每石加銀五錢每草一束加銀一分其加增之期  
亦照肅鎮補行給發以示朕軫恤邊兵之至意

雍正九年辛亥二月丁未

上諭大學士等從前阿爾泰兵丁駐劄之時糧運維艱是以廷議每兵每月祇給米一斗併羊價五錢邇年以來羊價漸長所給銀兩不足羊隻之值月米一斗亦有未敷不免半菽之虞朕心深為軫念查察罕叟爾每年屯種所獲富有餘貯而運送糧石較前亦易著將現今調撥軍營防守之滿洲兵丁每名月給米二斗四升九合其戍守阿爾泰之滿洲兵丁每名月給米二斗至察哈



爾土默特兵丁每名月給米一斗五升以示朕恩恤兵丁之意

五月甲子

上諭兵部今歲命往陝西西安駐防兵丁派出直隸張家口營兵一百八十餘名間各兵家口支領錢糧而該管武弁等以各兵應有錢糧俱給與新募之兵支領無可給發以致各兵家口三月未曾領餉日食不敷四路奔訴凡兵丁撥派他往者如馬兵一名原領月餉二兩則

以九錢付本兵為途中鹽菜之用以一兩一錢為養贍家口之資所有兵米亦仍令其家口支領若有新募兵丁則另行給與月餉並無以本兵錢糧付新募兵丁之事何以張家口官弁等錯誤遲延以至各兵家口餬口無資著該督該提鎮即速查明照例給發並將遲誤之處據實叅奏

癸未

上諭內閣朕視天下兵丁皆為一體莫不冀其生計有賴

俯仰從容然養育於平時者自有經常畫一之道而加  
恩於格外者則不得不由近及遠次第舉行如恩賞兵  
丁生息銀兩一事首先及於在京之八旗次則推廣於  
外省駐防及督撫提督標下又次推廣於各省鎮標皆  
令將軍副都統督撫提鎮大臣會同經理以為長久之  
計數年來固有料理得宜可濟兵丁之緩急者而措置  
未協啓人議論者亦往往有之則此事經畫之難可知  
矣至於各省協標兵丁雖同列行伍而駐劄分防之處

與督撫提鎮相隔遙遠若偶遇緩急必須文移往來多  
延時日始得領此數金豈能濟其一時之用若照例給  
發則現今督撫提鎮大臣辦理此事尚覺繁難未能妥  
貼副將以下等官豈可交辦此事恐徒貽累於弁員而  
無裨於兵丁之實用也近聞各省協標兵丁有謂督撫  
提鎮等不為代請而生怨望之心者不知國家之施恩  
並無偏向戎行之沐澤自有後先將來西陲軍務告竣  
國用充饒朕自徐思周遍加恩之策若伊等不察事勢

此時遽欲均需妄生冀倖是因朕逾格之恩而啓非分之望則朕惟有將現行之恩賞悉令撤回然後可以盡一豈不因數人之無知而阻衆人受恩之路乎思之思之

七月癸未

上諭大學士等各省駐防兵丁生齒日繁現今餘丁甚多若聽其閒散既無從學習技勇而定額錢糧亦難以養贍家口著各處將軍於滿洲餘丁內擇其能騎射可供

驅使者於額設兵丁之外添設若干名並作何給與錢糧操演技勇之處悉心定議而行

九月丁丑

上諭大學士等上年西路擊賊有功及帶傷患病之兵丁前已降旨令其各回內地營汛休息調理以示恩恤其凍傷手足致成殘疾者舊例查其子弟一人入伍食糧仍令地方官每月給米三斗養贍終身朕思本兵若成廢疾而家無可以入伍食糧之子弟恐月給官米三斗

不敷餬口之用實為可憫著該管大臣確查上年西路兵丁因擊賊受傷致成廢疾而家無子弟入伍者俱給與守糧一分以終其身用示朕加恩優恤之至意

雍正十年壬子二月乙卯

上諭大學士等賊人侵犯哈密塔爾納沁等處所派官兵征勦堵截其中多有步行者雖因將領無能觀望退縮致令賊衆逃遁而兵丁之奮力前驅勤勞實堪軫念著大將軍將大營塔爾納沁哈密等處此次出征之兵丁

查明分別賞賚其陣亡受傷之兵丁尤可憐憫著查明  
照例賞卹

三月戊午

上諭大學士等坐卡兵丁專司瞭望哨探之事較之在營  
駐劄兵丁更為辛苦且汎地離營既遠市買鹽菜未免  
多費著傳諭大將軍岳鍾琪除三大卡倫外其他各處  
坐卡兵丁每月加賞銀一兩羊價七錢俾伊等食用充  
足以示朕格外加恩之至意嗣後儻再有疎忽貽誤之



事定行從重治罪其如何挑選輪班之處聽大將軍酌量辦理

甲申

上諭內閣各直省督撫提鎮標下之兵丁朕俱賞給生息銀兩以濟其緩急之用而各省協營甚多一時難以普及欲俟軍務告竣國用充裕再思周遍加恩從前所頒諭旨言之詳矣上年大學士鄂爾泰在雲貴廣西總督任內奏稱滇省舟楫不通所有生息銀兩分派營運則

易聚總生息則難若督撫提鎮各標賞銀過多轉致不能營運漸生弊端因將各鎮應領銀兩令與各協營均勻分給同受國恩黔粵兩省亦彷彿照此辦理此鄂爾泰因地制宜行之於邊遠三省使兵丁均霑賞賚者今據廣東總督郝玉麟奏稱廣東督撫提鎮各標蒙賞帑銀共十萬兩計每年生息除賞給督撫提鎮各標蒙賞帑有餘剩銀兩應照各協營寨兵數之多寡均勻分給於雍正癸丑年開賞等語朕愛養兵丁一視同仁本欲令

其均霑恩澤但次第經理不得有先後之別今鄂爾  
泰郝玉麟通融辦理俾協營兵丁亦有以濟其緩急深  
慰朕加惠戎行之至意著各省督撫等酌量本地情形  
悉心籌運若可以照此變通辦理則協營兵丁可以早  
受恩賞誠屬有益但各省地方之利息輕重不同餘銀  
多寡不一若不能行之省分不必勉強從事做而行之  
也

四月壬辰

上諭辦理軍機大臣等西路兵丁口糧從前議定每名日支粟米八合三勺或炒麵一斤駐劄之時本無不足惟有事行走及對敵之際晝則追奔攻擊夜則防範巡查非駐劄之時可比恐舊數稍有不敷嗣後凡遇此等日期著每名日支粟米一升其應支炒麵之日每名日支一斤四兩俾兵丁等口糧寬裕以昭朕格外加恩之至意至分派屯種各兵耕耘播耨胼胝為勞其耕種之一月內所支口糧亦照行走攻戰之兵米麵一體增給著

即傳諭大將軍岳鍾琪等知之

五月戊辰

上諭辦理軍機大臣等巴爾庫爾出征之西安滿洲兵三千名寧夏兵一千名出口已將二年冬衣不無敝損應行加恩添補查莊浪現有存貯皮袍褂三千套皮帽三千頂著署督查郎阿巡撫許容再於蘭州添製皮衣一千套皮帽一千頂俱於秋間解送軍營賞給西安寧夏滿洲兵以示朕格外加恩之至意

庚午

上諭辦理軍機大臣等去年遣往巴爾庫爾軍營之京城  
驍勇官兵一百名巴爾虎兵一百名原令於襲擊烏魯  
木齊旋師之後即行撤回此兵俱係精銳軍營現資差  
遣暫停撤回每人著再賞銀三十兩以為整理衣服等  
物之用

閏五月乙未

上諭辦理軍機大臣等前因西路軍營兵丁行走攻擊之

時從前所定口糧不敷朕已加恩增給今思兵丁駐劄之時亦應使之口糧寬裕以鼓勤勞其如何酌量加增之處爾等妥議具奏

八月癸亥

上諭辦理軍機大臣等聞北路所派四省綠旗官兵數年以來有陸續在軍前病故者今年七月間該管將弁始接到部文而各兵家口從前所領月餉例應從病故之日追出歸入截曠項內朕思國家養育兵丁加恩優渥

而出征身故之兵丁尤朕所格外矜憫者其未奉文之前家口所領月餉悉著加恩免追再今年七月間該提鎮等始接部文而所轄協營道路遠近不齊奉文先後不等其秋季餉銀必有已經散給者著將各兵應扣秋季之項無論已領未領一概賞給以示朕恩恤故兵之至意

雍正十一年癸丑五月乙巳

上諭辦理軍機大臣等北路所派四省綠旗官兵有在軍



前病故者其本營於未奉部文之前家口所領月餉朕已於上年八月降旨免其追還今思西路亦有調撥別省之綠旗兵丁其中豈無在軍前病故者若將本營未奉部文之先伊等家口所領月餉按日著追實為可憫著行文各該省若有軍前病故兵丁月餉於未奉部文之前已經支領者免其追還儻有借給庫銀之處著以該省司庫存公銀兩代為補項

六月癸亥

上諭辦理軍機大臣等各省挑選之勇健兵丁原冀其龜  
勉出力各圖上進之路以膺國家厚澤因其中賢愚不  
等優劣不齊不得不甄別挑汰以示勸懲今挑出赴營  
各兵既循分守法有奮勇効力之心著給與馬步戰糧  
俾得內外充裕其自甘起程之時每人借支銀兩并上  
年十月借過等項俱著賞給免其在月餉內坐扣以示  
朕格外加恩之至意著勇健營總統周一德等曉諭各  
兵知悉

十二月丙辰

上諭戶部本年江南應徵漕米朕已降旨密飭該督撫等以半本半折徵收為接濟民食之用惟是漕糧既一半改折則漕船亦應一半停運定例漕船減歇之年該運丁給與一半月糧以為養贍但上年業已緩截本年又復減歇其行裝等項俱經預備於將次出運之時旋復停運則所領一半月糧或不敷用未免艱苦著將本年應支月糧等項悉行賞給

雍正十二年甲寅十一月辛丑

上諭內閣朕賞各省兵丁生息銀兩原交與該管大員善為營運以濟緩急之用從前有草率從事者即將此銀借給兵丁收取利息以為賞卹似此辦理甚不妥協朕已降旨訓飭嚴行禁止近間仍有無識無能之總兵官希圖省事暗中借給兵丁者又有兵丁假商人借領之名而其實自用官銀繳利者朕思兵丁切要用度莫大於吉凶二事朕既已賞給官銀則二事可以粗備至於

尋常衣食之類無銀則可節省有銀易至輕費此乃人情之常今見有官銀可借到手甚易一時用去將來補償無資其拮据之苦仍兵丁身受之豈朕愛養加惠之本意乎至於兵丁假借商名領銀繳利更為不可兵丁既非殷實之家又非久慣貿易之人虧折之後從何賠補不但領銀之兵受累於目前且致將來之兵不能需國家之恩澤此顯然可見者著各該管大員一一清查若有似此情弊速行更改儻官銀不敷營運不妨據實

奏間或地僻難於招商不妨輕減利息若取兵丁之息銀以為賞卹是以朕惠兵之心而成將來累兵之舉則該管大員經理不善之罪無可寬貸除從重議處外仍將虧欠之項責令賠補

雍正十三年乙卯閏四月甲申

上諭內閣從前賞給各省駐防兵丁生息銀兩因兵丁數少之處無大員管領難於經理是以未曾議及今查保定太原德州三處各駐防兵五百四名熱河駐防兵八

百名為數雖少亦應一體加恩以資吉凶之用保定太原德州三處各賞銀二千兩熱河賞銀三千兩保定熱河二處銀兩交與總督李衛派員管理太原銀兩交與巡撫石麟德州銀兩交與巡撫岳濬務令辦理妥協俾兵丁等得霑實惠

大清世宗敬天昌運建中表正文武英明寬仁信毅大孝至誠憲皇帝聖訓卷十七

欽定四庫全書薈要卷七千八百五十

史部

大清世宗敬天昌運建中表正文武英明寬仁信毅大孝  
至誠憲皇帝聖訓卷十八

察吏

雍正元年癸卯五月丁亥

上諭廣西巡撫孔毓珣據奏梧州府知府張若需等請陞  
補蒼梧道等缺蒼梧道員業已部選殷邦翰朕聞張若  
需居官聲名較優所以允行至其餘各員俱照爾所請



爾統率一省該屬員自必有深知灼見處始行奏請假若日後改易操行切毋存回護之念姑息從事今日因其賢能而保薦後日因其改易而糾叅正見爾之公正無私將朕此旨轉諭伊等俾各知警懼時加慎勉庶不敢恃被薦在前而稍有放縱也保薦一事甚難人或懷銜玉求售之心掩其不善而著其善一被愚惑他日受累不淺斷不可輕忽於一時也朕將合省百萬赤子付托督撫似此薦舉數人有何可疑而不推心信任其間

設有徇情納賄假公濟私實據斷不輕恕

庚寅

上諭大學士等刑部直省命盜案件主稿雖在刑部然必由三法司等衙門公同確勘畫題方行請旨今刑部議覆被盜疎防及人命失察等案有該督撫未將所屬地方官弁報叅者刑部於具題完結本尾聲明行令查叅到日再議嗣經該督撫有照例補叅者亦有援例請免者止用咨覆刑部既不再題又不照會都察院大理寺

衙門是以部中姦猾胥役得以操縱其事暗地招搖有部費者則爲援引輕例且有竟將咨文沉匿日久潛消者如無部費雖督撫聲明在所可寬不准邀免欺隱朦混事同議異嗣後凡三法司會議案件本尾有帶及行令補叅者督撫咨覆到部其或處分或寬免作何完結之後令刑部知會畫題衙門公同刷卷如此則胥役不得萌逞故智上下其手矣

六月乙亥

上諭吏部兵部三年舉行大計五年舉行軍政其居官優者列爲卓異劣者分別輕重置之八法所以澄敘官方勸善懲過典至重也朕思卓異八法所舉所劾不過十數人而平等供職不列舉劾者尚有多員如文官倉庫之盈虧辦事之能否武官騎射之優劣訓練之勤惰皆未填註考語是考課羣吏尚有遺漏之處也嗣後大計軍政除卓異八法照舊例舉行外其平等官員文職自知縣以上武職自守備以上俱於大計軍政之年令督

撫提鎮註明考語造冊報明吏兵二部務期秉公核實  
不得徇情任意顛倒是非爾等確議具奏

是日

上諭戶部各倉監督向有年限滿漢一同更換立法最善  
前任若有未清後任豈肯接受所以稽錢糧之出入而  
除虧空之弊端也惟通州坐糧廳貯有通濟庫每年動  
用輕齎等項司其出入關係錢糧數十萬兩而坐糧廳  
一差並無年限或滿員陞轉則更滿員或漢員陞轉則

更漢員滿漢參差更換彼此牽制回護勢難徹底澄清  
况在任日久倘有虧欠必至積累增多更難清理爾部  
可將通濟庫錢糧逐一確查務期明晰其坐糧廳一差  
嗣後或限二年或限三年滿漢一同更換庶接受之際  
不至含糊而弊端亦自此清釐爾部即確議具奏

雍正二年甲辰七月乙巳

上諭直省總督巡撫等引見月官內經朕改調人員特因  
地方緊要觀其人言動舉止似屬可用是以記名調用

然必俟任事後方可定其賢否若督撫不實心訪察而因朕一時稱許遂爾優容任其恣意行事豈朕改調之意乎再揀選命往各省人員該督撫亦不可因係揀選之人聽其妄爲不行糾叅此等人係朕特用必當益加勉勵實心愛民方不負簡拔之意倘任意放縱有玷官箴即當從重治罪嗣後督撫題叅官內有此等官員著將原係奉旨調用或揀選命往不思報効辜負擢用之處於叅本內聲明

雍正三年乙巳四月戊子

上諭直省督撫等爲政首重安民安民必先察吏邇年有  
司不能仰體

聖祖仁皇帝寬仁德意吏治漸致廢弛朕即位以來嚴加  
訓誡整飭官方欲其潔已愛民奉公盡職在朕並非苛  
刻亦非偏私乃有庸懦無能之督撫間有叅劾每向人  
云我若不叅恐非上意又恐他人叅劾於我不便以此  
等語解釋於衆似覺叅劾為迎合朕意而出於不得已



者即如浙閩總督滿保叅劾知府何國棟似屬迎合朕  
察其無貪污之蹟仍准留任則朕無成心可知矣前滿  
保曾奏浙閩屬吏已劾多員若再題叅恐致無人辦事  
魏廷珍巡撫湖南時亦曾奏稱屬員叅劾過半容再查  
奏等語夫屬員之去留惟視居官之優劣豈論叅劾之  
多寡朕心總出於至公爾督撫等安得以庸鄙之見偏  
私之心妄為窺測乎又聞外間議論云朝廷懲盜臣而  
重聚斂之臣此語尤為荒誕自朕臨御以來蠲免舊欠

錢糧不下千百萬兩江南蘇松之浮糧江西南昌之浮糧共免額徵銀五十餘萬此皆惟正之供尚且大沛恩膏特行豁免現今各省督撫大吏將諸項名色私派陋規裁革甚多莫非推惠於民尚得謂之聚斂乎至若虧空侵蝕以及貪婪枉法之輩蠹國殃民有干法紀既寬其誅已屬格外若不嚴追完項一任貪吏優游自得國法安在耶此明係朋黨匪人懷私捏造悖謬之語以惑衆聽殊屬可恨故特諭衆知之願爾內外大小臣工

深知朕心凡事秉公據理不可稍存迎合之見則庶政皆得其宜而吏治民生均有攸賴矣

雍正四年丙午八月丙戌

上諭內閣吏治惟在得人而各省有司員缺甚多非廣收博取不足備庶官之位故數年以來各省官員經朕揀選命往者亦多然當其揀選之時或見其奏對明白舉止從容或見其條陳事宜似屬可採遂入於揀選之中命往各省以試用之又有奉旨特用之員大約因督撫

上司等薦舉保奏朕召來引見見其才具可用遂加遷擢以鼓勵之此等人員朕不過取拔於臨時並未曾試驗於平日實不知其居心行事何如也伊等蒞任後自應倍加敬謹勉為良吏方不負朕格外之恩若自恃為揀選特用之員傲上陵下恣意妄行而該管上司以為朕所揀選特用之員不加約束委曲寬容則大非朕澄清吏治整飭官方之意矣朕以大公之心撫馭萬方凡屬臣工只論其居官之賢否以為進退豈以部選揀選

常用特用分別異視有所偏向凡爲督撫者宜深知朕心切勿以其爲揀選特用之員有意優待而姑容之倘居官不善即據實叅奏不爲隱蔽不涉瞻徇如此則人皆知儆官皆得人而於吏治大有裨益矣

十月戊寅

上諭雲貴川廣湖南各省督撫直省地方官辦理欽部案件皆有定限其不依限完結者例有處分惟邊省苗疆間有督撫自行歸結之案地方官因無限期遂生怠玩

以致案件稽遲民人受其拖累嗣後遇有民苗爭訟事  
件該督撫嚴飭該管各官作速查審完結如地界兩省  
或有關提之人或有會勘之處兩省大吏務須和衷辦  
理不得互相推諉其有不肖有司託故稽遲巧爲推卸  
者亦當指名題參毋得徇庇

雍正五年丁未三月丙申

上諭吏部盛京五部司官多係本處居住之人互相交結  
瞻徇情面欺蔽上司朕屢降諭旨不能悛改若不盡行

調換難於整頓爾部將盛京本處之人現任郎中以下  
主事以上人員查明人數悉行調來以京員用其員缺  
著在京各部堂官揀選辦事中等司官爾部帶領引見  
補用所遺員缺即將盛京撤回之員補授如此則盛京  
堂官易於辦理而盛京部院積習可以悔改矣

閏三月丙寅

上諭內閣凡州縣錢糧之虧空總不出侵欺那移二項當  
其侵那之時官固主之而經手之經承自無不知也乃

不行稟阻且從而懲憑之以便作姦分肥迨至本官監  
追而經承且優游於事外本官問重罪而經承僅得不  
行稟阻之處分故凡虧空纍纍多由於官吏之相成也  
朕以爲經承庫吏經營倉庫之人亦宜重其處分之例  
更定以勸懲之法凡州縣官到任先揀選殷實老成胥  
吏二人充錢糧總吏通詳報部凡徵收錢糧即令隨徵  
報解不得存留內署承辦五年該縣無虧空者即將總  
吏咨部以九品雜職即用本官少有虧空該總吏力行



稟阻如不聽從許徑赴司院呈明免罪若該吏不行稟阻致本官以虧空糾叅即將經承一同監追減本官一等治罪如此則經承有所勸懲不敢順從本官擅動國帑亦杜絕虧空之一法也

乙酉

上諭內閣各省建立忠義節孝祠宇及賞給老民老婦布絹米石皆係朕之特恩凡地方有司自應實心奉行以彰朝廷曠典昨據安徽巡撫叅奏太湖縣知縣冒開老

婦名數至二千餘名之多即此則各省有司之奉行不能無弊可知矣建立忠義節孝祠宇表揚德行在地方有司獎善慕義之公心即捐輸已資亦當勇往今朕動用國帑為之建立而承辦各官尚恐於冒銷錢糧草率從事以致易於傾圮有此情理乎著行文各省督撫詳加察勘有無冒銷果否堅固之處不得容其朦混并令各地方官將所建祠宇造入盤查冊內前後交代倘工程不堅未久即至坍塌者仍著落原辦之人賠補至於

永遠照着修葺則係地方官分內之事若能隨時整理所費不過數金多亦不出數十金甚易為力嗣後責成於地方官則彼必視為已事時時留心大於祠廟有益倘准其動用正項錢糧修理則不肖有司必至借端開銷而姦胥猾吏又從中侵漁入已有名無實屋宇必至頽壞負朕彰善闡幽之至意矣太湖縣冒開老婦名數業已被叅各省州縣必有冒濫開銷及胥吏朦混侵蝕等弊著各省督撫一併確查如該地方官將浮冒之處

自行出首免其治罪倘仍隱匿不報或經旁人告發或被督撫科道等題叅定行嚴加治罪

六月丁亥

上諭內閣學政一官所以化導士習養育人材職任甚重近年以來各省督學諸臣頗能仰體朕心祇遵朕訓矢公矢慎杜絕苞苴深可嘉獎但向來學政恣行貪劣以國家興賢造士之途視爲射利營私之地此固本人之不肖而亦大半由於提調官員贊成之也其學政之秉

心貪劣者與提調官通同作弊固不待言而學政之可與爲善可與爲惡者提調官則引誘之或挾制之使不得全其操守而於其中網取厚利此提調官之惡習而天下之所通知者也學政原有闕防若提調官持正秉公則學政必不能肆行無忌學政果能公明廉潔提調官更當敬禮而玉成之豈可反導之爲非乎提調與學政相爲表裏嗣後學政聲名不好應將提調官一併議處其如何定例之處著九卿會議具奏

七月丁巳

上諭吏部各衙門筆帖式在部院辦事者必當慎重揀選  
補用方於部務有益嗣後補用筆帖式時爾部將應補  
之人俱帶來引見朕酌量補用再筆帖式內若有不願  
在伊本衙門行走因而告病解退希圖另補好缺者其  
起補時俱著於伊本衙門缺出補用再盛京人員赴任  
向來原無憑限往往補用之後經年累月竟不到任其  
堂官亦不咨查至現任官員有告假來京者亦多無故

稽留不回本任以致部務廢弛此等風俗不可不  
加意整理嗣後選補盛京官員以奉旨之日為始扣限一個  
月到任若有違限者該堂官查明咨部題參照例議處  
除公事差遣外有告假來京者該堂官奏明奉旨給假  
方准其來京

雍正六年戊申五月己巳

上諭內閣國家舉行大計乃三年考績之大典其中卓異  
人員皆加以特恩不次擢用誠以該管上司為國家薦

拔人才必深知灼見然後列爲卓異斷無有徇私受託  
草率冒濫以負國恩而辱鉅典者而到任未久之上司  
不能深知屬員之賢否又准其題請展限以俟確訪如  
此則屬員人品之邪正自無有不能辨晰之理乃見有  
從前卓異之員而後任內竟至貪贓枉法罹於重罪者  
夫以三年之久數百屬員之多保舉數人以光大典則  
非一時應詔薦舉可比也其人既犯貪贓枉法之條則  
平日必係行止姦邪之輩又非尋常註誤及才力不及



之類可比也督撫提鎮等專以察吏爲務而乃以此等  
之人列爲卓異及至敗露之後尚可藉口於知人之不  
易不能保其將來乎此等若不定以處分恐相沿日久  
必有濫舉失實之弊嗣後文武卓異官員有犯貪贓不  
法之款而審訊確實者將從前列爲卓異之上司一併  
議處倘於該員未敗露之先有能查出叅奏者免其處  
分其如何定例之處著九卿詳議具奏

七月戊午江西巡撫布蘭泰叅奏清江縣知縣牛

元弼祈雨不親屠禁方開張筵唱戲政務不理臨  
江府知府吳恩景代為隱飾請均予革職

上諭內閣牛元弼於屠宰開禁之後開筵唱戲不比祈禱  
之時若牛元弼平日性好聲歌耽於逸樂則布蘭泰何  
以不早行叅奏至所叅政務不理亦當實指其廢弛者  
何事今因一時意見遽將該縣嚴叅竝知府一同革職  
定例內屬員犯貪贓重罪者知府徇庇及失於覺察其  
處分止降級調用今因屬員唱戲而遂將知府奏請革

職似此越例之事幾有作福作威之意矣朕之待督撫大臣深加信任常有督撫叅劾尚輕而朕從重處分者總以揆情度理期於公當而已凡爲督撫者當爲國家愛惜人才而於叅劾之間尤當加意慎重若誤去一幹員其過更在誤薦劣員之上蓋薦一劣員而誤用之異日自然敗露若將幹員誤行罷斥則其人終身放廢不可復振天下人才幾何豈可因一時之喜怒而濫行摧折乎察吏之道公明二者缺一不可若存心本公而識

見不到必致爲屬員所欺瞞浮言所蒙蔽布蘭泰之存  
心雖無徇私而少知人之明且瑣屑不識大體地方雨  
暘之時若水旱之爲災全係乎督撫大臣之感召若果  
能布德存仁安民察吏自能上感

天和豐亨有慶若政事有闕舉劾失宜以致雨澤不能應  
時而降此時徒恃祈禱之虛文已屬庸鄙之見而乃欲  
諉過於屬員以謝己之責不亦屈抑之甚乎牛元弼吳  
恩景不必革職若二人任內另有虧空劣蹟著布蘭泰

查明績叅再降諭旨若別無款蹟可叅著將牛元弼吳恩景送部引見候旨另用

乙亥

上諭內閣前山東叅革知縣朱成元令家人叩閣一案朕命學士繆沅前往審理據繆沅將朱成元蒲臺縣任內餽送巡撫布按各官規禮印簿查出陳奏朕一一閱看知係朱成元任內二十餘年餽上司之陋規而自雍正正元年以後仍復餽送如故已交部嚴察議奏自朕即位

以來嚴飭官方禁止私賄又恐督撫等官用度不敷暗中巧取是以給與養廉之項俾其公私有賴俯仰從容庶永杜苞苴以爲澄清吏治之本蓋上司既受屬官之餽遺又何以禁止屬官之貪墨甚至以餽遺之多寡分情誼之厚薄則屬員之優劣何由辨別而吏治尚可問乎各省督撫養廉之項皆經奏聞奉旨者司道等官亦皆於公用內支給其無公項可支之員亦應於督撫前陳明准其收受何項以爲用度豈有朝廷既給養廉而

仍收受屬員陋規之理今觀山東巡撫司道等官之私受陋規如故則他省或有似此欺隱私受者亦未可知著各省督撫一一嚴查據實陳奏在地方官薪水之資自不可缺但於屬員之手接受節禮陋規則斷乎不可目今各省內或有尚未分給養廉之員著各省督撫悉心商酌辦理奏聞寧可以州縣應出之項解至藩庫從公發給而不可使其自相授受廢公議而徇私交留禮儀交際之名而長貪婪賄賂之弊也倘再有私收規禮

者將該員置之重典其該管之督撫亦從重治罪

八月己卯

上諭直省督撫等知府一官管理通郡有察吏之責如知府得人則察吏以安民於地方實有裨益但知府內有僅係循分供職不能察吏而又素無過犯不至於叅劾者此等人員若令其久任地方於屬員賢否必不能詳察周知於吏治無益著各省督撫將現任知府詳加甄別其有才具中平不能察吏者一面具題以在京部屬



改補仍令該員暫留本任辦事一面於本省同知以下知縣以上等官內揀選能勝知府之任者保題送部引見如所保人員可用准其補授俟伊到任後著前任知府交代清楚來京以部屬之缺改用如此則因才器使辦理部務得人而各省知府均屬勝任之員矣若所保人員到京引見時朕察其才具亦屬中平則仍將前任知府留於原任各省督撫宜秉公詳擇以副朕澄叙官方之至意

雍正七年己酉正月癸丑

上諭戶部朕聞糧船過淮所費陋規甚多有一幫費至三四百金者旗丁既多苦累勢必多索於民甚爲漕政之弊嗣後著派御史二員前往淮安專司稽察之任不許官吏人等向旗丁額外需索以致擾累其糧艘攜帶物件除照例許帶外該旗丁如有夾帶私鹽及違禁等物者亦著該御史稽察但不得過於吹求以致糧運遲滯至糧船抵通之時其該管衙門官吏及經紀車戶人等

恐有額外需索陋規者亦著派御史二員前往稽查差往淮安之員著於二月初派往差往通州之員著於三四月內派往不必拘定滿漢各一員著都察院按期開列請旨

五月庚申

上諭內閣凡遠省烟瘴之地及沿邊沿海之區因其險阻荒涼或民情難治是以有司缺出或揀選補授或將內地之員保題調補該員到任之後有歷俸三年即陞者

亦有五年卽陞者所以恤其苦而賞其勞加恩於常格之外也乃向來督撫等徇情受託往往庇護私人以保題烟瘴邊缺為名俾得速於陞遷仍將其人委署近地輾轉留滯而本任竟屬虛懸是以緊要之缺轉成閒曠之所矣近年以來雖州縣正印官不敢仍蹈故轍而同知通判等員則聞尚有借委署他處之名不到本任延至數年俸滿居然得以陞遷者此等弊端甚有關係嗣後著嚴行禁止倘有應行署理之處著該督撫就近差

委不得使屬員巧為規避之計倘有仍前營私作弊者  
經朕查出定將該督撫及本員一併從重議處

閏七月壬午吏部帶領各督撫保舉之知府引

見

上諭曰知府一官承上接下以察吏安民為要務督撫統  
轄全省地方遼濶屬官多至百數十員察核賢否自難  
人人確當所賴者汝等府道耳一府所屬其多者不過  
十餘州縣耳目易於周知如能與督撫同心協力則舉

劾悉當吏治自然肅清但不得背公違理迎合督撫之意如屬員果賢督撫或有苛求爾等須竭力保全不可搜求詳揭若係不肖之員雖督撫密露庇護之意亦不可委曲順從蓋劣員貽誤地方即此時順從督撫曲為徇庇將來倘被新任督撫題叅徒然貽累己身若秉公察吏獲罪上司即被叅劾至於降革朕調來引見面加詢問果係情真理當必將誤叅之上司嚴加處分在汝等何害乎至秉公持正之督撫爾等又不得與所屬人

員通同欺詐朦蔽譬如督撫與朕必能一德一心方可  
整官方而清吏治若各懷欺隱之心朕亦難於辦理矣  
從來人材難得朕欲爾等察吏並非苛刻搜求細事以  
叅劾詳揭為能如屬員之過出於無心情有可恕務必  
盡心教訓冀其悛改至再蹈前轍然後叅揭方不屈抑  
人才爾等皆有志上進之人若能協同督撫報効國家  
撫綏百姓將來陞授大員時自有賢能屬員來相贊助  
也古語云使天下無一夫不獲其所實非人力不能之

事一府之大或一人之力不能周到若一州縣得一好官則一方百姓自受其福庇推之天下州縣各得其人豈非匹夫匹婦各得其所之明驗乎所以治天下之道惟在察吏一事再近來外官多有視督撫之行事以為進退者如遇才守兼優不徇情面不避嫌怨之督撫即踴躍向前若遇中等督撫則凡事因循觀望不肯盡心殊非臣子竭誠供職之道爾等總宜改除陋習勉盡職守以圖上進若不公忠勤慎報効盡職不惟深負朕恩



且有何顏面以對保舉之人而恐貽累於知己之上司  
耶爾等赴任務期夙夜凜遵毋負朕諄切訓誨之至意  
十一月己亥

上諭內閣各省兵丁於糧糈之外給以季餉所以撫養士  
卒令得仰事俯育以為地方捍衛所關甚重而朋銀一  
項於俸餉內扣留貯庫為各營買補馬匹之用亦國家  
恤兵至意也近聞直隸布政使衙門姦吏於請領朋銀  
時每匹扣陋規二兩至二兩五錢不等直隸如是他省

大約皆然夫倒馬立有限年報銷復有成額豈容姦胥  
舞弊侵扣嗣後著各督撫及布政司查照定例按期給  
發如有姦吏增減剋扣遲延等弊各該督撫即行拏究  
按律重處倘督撫失於覺察布政司不能釐剔弊端朕  
有訪聞定一併嚴加議處至兵丁歲底預借春餉及支  
放季餉亦聞有不肖餉書於放餉則需索季規於借餉  
則科斂借費此種姦弊深可痛恨著各督撫一併嚴查  
禁革務須按季給發不得遲延該部通行直省督撫布

政使將朕諭旨刊刻曉諭俾官吏兵弁等咸知之

雍正八年庚戌五月壬辰湖南安陸府知府談九

敘等恭請

聖訓

上諭曰知府一官有承上率下之責關係吏治民生最為緊要爾等勿視為傳舍但務逢迎上司以圖陞遷為榮身之計果能察吏安民實盡其道即使終身不得遷轉亦足留名譽於將來若一味請託鑽營希圖保薦縱一

時倖獲寸進而公論難免何能掩人之耳目哉刑名事  
件知府尤為上下關鍵務期明允公當地方始無冤民  
不可聽屬員懇求亦不可畏上司駁詰而草率苟且以  
致訟獄顛倒下結民怨上千

天和若催科一節固有考成果遇水旱災荒自當據實申  
詳加意撫恤不可隱匿以圖省事亦不可捏報以滋弊  
端夫寬大惠愛者乃為政之要道朕非令爾等嚴厲苛  
刻以從事也但古人云養稂莠者傷禾稼惠姦宄者賊

良民若保全貪官污吏以博長厚之名縱容地棍土豪  
以沽安靜之譽此大有害於人心吏治者也沽名邀譽  
乃居官之大患大凡在任時貼德政之歌謠離任時具  
保留之呈牒皆非真正好官也惟去任之後紳衿百姓  
思念不忘則不愧古之循良矣知府與知縣不同知縣  
為一邑之宰果能殫竭心力使四境之內民人樂業便  
是良有司至於知府則有統轄屬員之職若各屬之內  
有一人居官不善在知府分內即為一分曠職不可云

潔已謹守遂可無忝牧守之任也天下人才難得倘過  
於苛刻摧殘則因細故微瑕而至於放廢終身者不少  
矣總之遇好官則當愛重保護之遇中材則當勸導扶  
掖之遇劣員則當懲治罷黜之以此督課屬員有不觀  
感興起者無此情理也至於叅罰案件外官必不能免  
朕從不肯以情有可原之案廢棄賢員常有因公叅處  
之州縣官朕見其人才可用而逾格加恩遷擢者爾等  
勿存見小之念顧惜功名局於庸衆之規模而無遠大

之器量也將此諭旨吏部通行天下之知府直隸知州知之

雍正十三年乙卯七月乙巳


上諭九卿各省拏獲賭具查其製造年月在半年之內者大小官員有議叙之例所以獎勵臣工使之實心禁約賭博也今朕訪聞各省拏獲賭具均稱造賣在半年以內迨細心根究率多不實蓋地方官希冀議叙未免支飾邀功所恃上司稽核精詳庶幾功過不爽然上司又

例得並叙苟非公正不欺者勢必苟且雷同此朕訪聞  
最確者夫賭博之害最關風俗人心澄源端本則賭具  
在所必嚴計效責功則勸懲誠難偏廢然州縣身任查  
拏而上司則不過嚴為督率本屬分內之事今因並敘  
之例轉滋徇捏之端而不能收勸懲之實效應作何分  
別定例著九卿悉心妥議具奏





大清世宗敬天昌運建中表正文武英明寬仁信毅大孝  
至誠憲皇帝聖訓卷十八



總校官庶吉士 臣張能照

校對官編修 臣周厚轅

謄錄監生 臣沈東昇

謄錄監生 臣陳廷瑜